

BUINIS

**Un milion e mieç di euros di plui, a pet dal 2008, graziis al gnûf criteri gnûf che al è stât adotât dal ministeri par spartî une part dai finanziaments statâi aes universitâts**

# Ateneu, cualitât premiade

Pe Universitât dal Friûl al vâl un milion e mieç di euros di plui, a pet dal 2008, il criteri gnûf che al è stât adotât dal ministeri par spartî une part dai finanziaments statâi a pro dai ateneus talians.

Ai 24 di Lui, biel che il guvier al screave la agenzie di valutazion dal sisteme universitari Anvur, il ministeri Mariastella Gelmini e firmave il decret sul font di finanziamento ordenari Ffo, cul 7% dai bêçs a disposizion (525 milions di euros in dut) di dâ fûr seont la cualitât de ricercje (2/3 des risorsis) e de didattiche (1/3).


Daûr di chescj criteris gnûfs di cualitât, l'Ateneu dal Friûl al devante il IX de classifiche des universitâts virtuosis, mertantsi une incressite dal 1,95% dai siei finanziaments statâi.

Miôr di Udin a àn rivât a fâ dome Trent, i politecnics di Turin e di Milan, Bergamo, Gjenue, Milan Bicocca, Rome Foro italico e Turin.

A pet di 27 universitâts virtuosis, la classifiche e à pandût 27 ateneus no virtuos, che par lôr i finanziaments a son calâts in proporzion.

E à fat scjas, in cheste situazion, la posizion des universitâts di Triest, di Florence e di Siene. Par lôr la assegnazion dai finanziaments dal 7% e reste sospindude "in spiete che a presentin un plan finanziari par justâ i balançs che, in zornade di vuê, a risultin negatîfs".

Pal IX puest dal Ateneu dal Friûl e ancjemò di plui pal milion e mieç



**Un laboratori de Universitât di Udin: la cualitât de ricercje che si fâs chenti e je ricognossude a nivel internazionâl**

di euros che a jentrin te sô casse, a àn gjoldût tant il retôr Cristiana Compagno che i sorestants academics.

Al fin, la universitât regionâl e spiche ancje fûr de classifiche negative dai ateneus mancul paiâts dal stât (cun 108 milions di euros di mancul di chei che e varès vût di ricevi, fra 2001 e 2008) o di al-

tris classificjis che, pûr valutant merts e cualitâts, no garantivin nisun efiet pratic e finanziari, come par un esempli chês dal ultin scandai Censis-la Repubblica, presentât sul ultin numar dal Diari.

La firme dai criteris gnûfs sui merts scientificis e didattics dai ateneus e je stade benedide ancje dal parlamentâr udinês Mario Pittoni,

dean dal grop de Leghe te comission istruzion dal senât, che al veve lotât par mudâ intune leç il principi de division dai finanziaments daûr i merts.

"Lis cifaris a son ancjemò bassis – al à comentât Pittoni –, ma il ministeri Gelmini e à confermât di jessi persuadude a incressi la cuote dal 7% za pal 2010. Noaltris, tai agns avignî, o smirin di rivâ a spartî daûr dai criteris dal mert il 30% dal font di finanziamento ordenari, che al corispuint sù par jù a un miliart e votcent milions di euros".

"Se chel 7% al rivarà al 30% – e à judicât il retôr Compagno –, la assegnazion dal Ffo e bandonarà il vieri finanziamento storic, par concentrâsi sui risultâts. In chel câs, Udin al varà ancjemò plui beneficis e duncje o cjali devant cun speranza e cun fiducie".

Ma a son scatadis ancje lis polemichis. Il préssident de regjon Sicilie, Raffaele Lombardo, e cualchi puarte vòs dal mont academic meridionâl a àn protestât pe penalizazion dal Sud Italie. Ma il ministeri al à replicât bot e sclop: "I criteris a son stâts sielzûts cun valutacions in zornade e cjapant sù i parametris adotâts di dutis lis classificjis internazionâls. E je la prime volte che in Italie si fâs cussì, par cui alc si podarà ancje miorâ", al è stât pandût intun comunicât dai 25 di Lui. "Ducj però a àn di metisi tal cjâf che e je finide la ete cuant che, in spiete di perfezionâ i criteris di sielzi, no si tacave mai a fâ nuie".